

## Dua pelatih Puspen Raub ditemukan lemas

BERNAMA



GAMBAR HIASAN

Kuantan: Dua pelatih lelaki Pusat Pemulihan Penagihan Narkotik (PUSPEN) ditemukan lemas ketika mandi tasik di pusat pemulihan itu yang terletak di Kampung Kundang Patah, Raub hari ini.

Penolong Pengarah Operasi Jabatan Bomba dan Penyelamat Malaysia (JBPM) Pahang Ismail Abdul Ghani berkata, mayat mangsa pertama berusia 43 tahun ditemukan pada kedalaman 10 meter pada 4 petang, manakala mangsa kedua 37 tahun ditemukan empat minit kemudian pada kedalaman lapan meter.

"Pasukan bomba melaksanakan operasi mencari dan menyelamat mangsa dengan melakukan pencarian di permukaan air dan menggunakan peralatan *grappling iron*," katanya dalam kenyataan hari ini.

Beliau berkata, pihaknya menerima panggilan kecemasan pada 3.04 petang, sebelum tujuh anggota termasuk pegawai dari Balai Bomba dan Penyelamat Raub digerakkan ke lokasi kejadian bagi menjalankan operasi lebih sejam itu.

**Disiarkan pada: Mei 19, 2022 @ 6:08pm**